



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym

tiryimym@aolima

tir yimym

TAPAK 3



## Putin-i South Korea dang Ukraine nem nok-nü magütsütsü ashir

VOL. XXI ISSUE NO. 251 (ADOK 251)

## Punjab tepuokdak yua aliba Naga lanurtem yaritsü

Dimapur, June 22, 2024 (TYO): June 22, 2024 nü Chief Minister Neiphiu Rio-i New Delhi nung Punjab nung Naga nung lanur 45 tepuokdak aliba ken o jembiogo.

CM Rio-i Advocate General, Nagaland, K.N. Balgopal den Punjab kübok Mohali Jail nung Naga lanurtem puoka aliba indang jembi.

Indangji pai Advocate General dang iba ken o atema mapa inyaktü

asert lanurtem chioktsü atema telok ka yoktsü tetuyuba agütsü.

CM Rio-isa Resident Commissioner in-charge of Nagaland House, New Delhi dang Naga lanur kibongtem den osang agiteptsü aser nungdakba teyari agütsütsü tetuyuba agütsüogo.

Punjab tepuokdak aliba Naga lanur tsüraburtem/kinungertemi Nagaland sorkar den tongteprateptsü mepishia metetdaksüogo.

## NBCC-i ULB election nung timi shilem agitsü mepishir

Dimapur, June 22, 2024 (TYO): Mapang talangka election timi magitetba ajanga asen lokti kanga timtema arur aser iba ajanga telemsa talila adoker aser tai tongloktsütepba manener ta Nagaland Baptist Church Council (NBCC)-i ashi.

Anungji Nagaland nung Urban Local Body (ULB) elections mapang candidate tem aser vote enoktsürtemi tebilemsü khuret bena timi shilem agitsü mepishir ta NBCC-i metetdaksüogo.

June 26 nü urban local body (ULB) elections nung 'nisung ka, vote ka' aser 'pei mulungsentsü agi vote' agütsütsü ayongzüker ta NBCC-i ashi.

"Asen ward ajangzüksü atema lennir shitak shimtsü

atema vote enoktsüdi" ta parnokisa ayongzüker.

"Candidate ajak ya inyaktü akokertem lir ta asenoki amangdi aser asen vote ajanga asenok ajak ajangzüksüsa inyaktüsupur candidate shitak shimtsü merangdi" ta NBCC-isa metetdaksü.

Candidate temi lokti tenzüksü nangzükba ama Tsüngremi agütsüba lenisüba sempet amshitsü ayongzüker. Külen vote enoktsürtemia nür ward/colony atema lennir shitak shimtsü atema sarasademer ang vote enoktsütsüla, ta parnokisa ashi.

"Asenoki o jembiba angardang vote meinoktsütsüla. Shibai colony atema tebilemsü abener aser shibai na atema inyaktü ta shisadanger ang iba nisung nemji vote enokjang" ta NBCC-isa ashi.

## RPO Guwahati nem 'Passport Seva Puraskar' agütsü

Dimapur, June 22, 2024 (TYO): June 22, 2024 nü New Delhi nung Annual Regional Passport Officers conference amongdang Regional Passport Office, Guwahati nem 'Passport Seva Puraskar' agütsüogo.

Iba sentong nung Minister of State for External Affairs, Kirti Vardhan Singh ketnungi Regional Passport Officer, Guwahati, Cherakung Zeliang, IFS-i sempet agizüka liasü.

Linük nung Regional Passport Offices 37 aliba nungi Regional

Passport Office, Guwahati-i iba sempet agizüker.

Ministry of External Affairs (MEA) ajanga grievance handling, average print & distribution time, files granted on same day, per staff average productivity amala onüktem nung ajemdaker Passport Offices asadanga liasü.

Guwahati nung aliba Passport Office ajanga Assam, Arunachal Pradesh, Manipur, Meghalaya, Mizoram aser Nagaland repringer.

## Asür L. Tulu Imsong mang ayimer



Dimapur, June 22, 2024 (TYO): Tir Yimym yimozülur kinungtsü Wt. Chubala Imsong tebu L. Tulu Imsong yasung iba lima nungi pilaa aogo.

Pa den asüpila sentep sentong June 23, 2024 nikongdang 2:00

ako nung Changtongya Town Baptist Arogo nung agitsü.

L. Tulu Imsong ya akhidang Longleng ya Tuensang district kübok alidang Phomching, Mongnyu aser Longleng nung tesayur mapa inyaka liasü aser tesülen Food & Civil Supply department nung Sub-inspector mapa inyaka lia mapang agi tonger mapa nungi anen.

Pa Changtongya Town Baptist Arogo nunga deacon mapa nung tenzüker tajung ka liasü.

Pa arishi küm 94 nung Dimapur nung par Chirnurtem kidang lia Kibubai jar ogo.

## Centre-i NTA director general melener; Tongti tai tongloktsür ka apu



Ravi Atri

New Delhi, June 22, 2024 (Agencies): NEET aser UGC-NET tatidangtem nung ashishitep ken o tulu adoka aliba mapang ka nung Centre-i Honibarnü National Testing Agency (NTA) director general Subodh Kumar Singh mapa nungi anentsüogo.

Centre-i Department of Personnel and Training nung Subodh Kumar ya "compulsory wait" nung yutsüogo aser retired Indian Administration Service (IAS) officer Pradeep Singh Kharola-i NTA director general inyaka atatsü shimogo.

NTA ajanga NEET, UGC-NET, CUET aser JEE (Main) tatidangtem ketdangsa agir.

1985 batch IAS officer Pradeep Singh Kharola ya Prime Minister's Office (PMO) nung adviser Amit Khare den kanga junga metettepa lir. Kharola-i taoba nung Civil Aviation secretary

State kar nung tatidang magidang NEET question paper

temai adoka lemshiba putetba sülen linük ajungalen lungkak aitba mapang ka nung Centre-i NTA director general mapa nungi anentsüogo.

Maneni, June 23, 2024 nü NEET-PG 2024 tatidang agitsü aliba thinenogo.

Candidate 67-i 720/720 marks anguba sülen NEET-UG results atema ashishitep ken o adoka liasü. Külen, kaketsür 1,500 tema nem grace marks agütsüba atema ashishitep aser okadak balala nung ken o benoktsü tenzük. Supreme Court-ia NTA inyaksangshi aitsüogo.

NTA-isa tawa UGC-NET tatidang agiba athi. June 18 nü tatidang indang question paper dark net nung temai adokba metetba sülen tatidang thiogo.

Honibarnü Centre sorkarisa ISRO Dr K Radhakrishnan lenisüba kübok high-level committee ka tentetogo.

Iba luden ajanga ita ana tsüngda NTA ketdangsubaren meyipa repringshimtsü, tatidang agibayim melenshitsü aser data security protocols tajungba melentsü mapatem lemezüksüogo.

'Solver Gang' ajanga NEET Paper Leak asü

NEET-UG 2024 exam paper leak tasa atonga inyak ta tai tonglokja aliba nisung Ravi Atri puogo. Uttar Pradesh Special Task Force (STF)-i pa apu.

Atri ya Greater Noida kübok

Neemka nung lir aser question paper temai adoka yokshitsü tasa atonga inyakba atema tai tonglokja lir.

Tesüiba nunga Ravi Atri-i state balala indang exam paper leak asüba maparen nung shilem agiogo ta tai tonglokja lir. Pai 'solver gang' ta ajaba network ka ajanga social media sabangtem nung solved question papers upload asür.

2012 nung medical entrance exam papers temai adokba ken o atema Delhi Police Crime Branch-i pa apuba mapang nungi pai ozüng alema inyakba meteta lir.

Mezüngbo Bihar Police-i question paper leak asüba dak sendakba nung kaketsürtem dena nisung kar apu. Ajisüaka bushisüngdanga arudang state adena aotsüsa aküm aser nisungtem dang asüngdangya asü dang Ravi Atri tenüng tetshiba ajanga UP STF-i apu.

2007 nung Atri'er kibong pa medical entrance exam atema renemshitsü asoshi Kota-i yok. 2012 küm pai medical entrance exam nung takok angu aser PGI Rohtak nung admission agi. Ajisüaka fourth year nung pai tatidang magütsü.

Iba mapang tashi nungbo pai 'exam mafia' den tesentaktep yangluadoker liasü aser tanga candidate tem atema proxy ama inyak. Atri-isa kaketsürtem den leaked papers prokshiba mapa inyak ta ketdangsurtemi ashi.

## Tenyimi Union Nagaland mezüngbuba Foundation Day among

Kohima, June 22, 2024 (TYO): Tenyimi Union Nagaland (TUN)-i Naga nüjiso atema inyakertem aser civil society lennirtem dang Naga yimten latetsü nukjidong atongtsü atema talila merangtsü ayongzükogo.

TUN nung Angami, Chakhesang, Pochury, Rengma aser Zeliang kintem dena lir aser parnokki mezüngbuba Foundation Day amongdang bangzüng tenet renemba nung iba ya ka liasü.

TUN-isa Tenyimi nung tamangba, yimten lennirtem aser ketdangsurtem dang Tenyimi sobaliba tajung benshitsü ayongzüker.

Eastern Nagaland Peoples' Organisation (ENPO)-i par tesemtem tajungba akümsü inyakba atema süoki ia bilemer saka ENPO dang Naga nung longjema aliba aser 1955 küm excluded Area (Free Nagas) nungi Nagaland züngdokba meraksatsü mepishir ta TUN-isa metetdaksü.

agitsü ayongzükogo.

Nagaland Legislative Assembly-i March 1, 2024 nü India sorkari Myanmar aser India tsüngda atsü dangtsü lemetetba meyipa repringshimtsü lemetetba nung TUN-i pusema nungiter. Arrtsü atsü dangba ajanga Free Movement Regime (FMR) malitsü aser Naga nung adianutem lemdangtsü, ta parnokki ashi.

Nagaland arrtsülen palm oil tsünütsü sentong magizüker kechiyong iba ajanga arem-min samatsütsü ta TUN-isa metetdaksü.

Parnokisa Nagaland nungi Lok Sabha MP S. Supongmeren Jamir nem tenüngsang agütsü aser pa tarutsü wadang ajak moatsür ta ashi.

"Nagaland nung Tenyimi kintem khurettem repringtsü aser ano state sorkar dena onük kar inyaksangshitsü atema TUN tentet. Ajak ajungtsü atema Tenyimi kin pungu longjem" ta Angami Public Organization (APO) president Razouvtuo Chatsu-i ashi.

Naga loktiliba nung lenisüba

tebilemsü lir. Naga nung oboula nung ochishir, meranga inyaker aser kati ka akhümsübu agütsürtem liasü saka tanü asen loktiliba nung lennir onsara akümba ajanga Naga loktiliba sasep nung tebilemsü bentsür arur, ta Razouvtuo-isa ashi.

"Asenoki Tsüngrem tsübuba lennirtem anitetsüla aser talisa lennirtem dang nenoki loktiliba anitsü atema nendaka agüja aser ochishia inyaker asü?" ta paisa asü dang.

TUN President Kehhwengulo Lea-i o jembidang TUN ya June 23, 2023 nü tenzük saka taküm Deobar ajuruba agi anogo ja jelia atsüzüker amonger ta ashi.

"Tenyimi nung temeten aser taginübatem kümzüka ayutsü, Tenyimi nung tsüngda telongjem, tangatettep adoktsü, Tenyimi sobaliba wazüka ayutsü aser ajungkettsü aser nisung ajak den yimjung aser tesü nep nung alitsü atema TUN tenzük. Asenok longjemba ya shinga anema masü saka Naga nung longjemba aser yimjung nung aliba nung tongshi ka asütsü atema tenzükba lir" ta Kehhwengulo-isa ashi.



### Mkgnung International Day Against Drug Abuse anogomung amung



International Day Against Drug Abuse and Illicit Trafficking anogomung nungtem nung June 22, 2024 nü Deputy Commissioner, Mokochung, Thsuvisie Phoji-i Mokochung jila nung Half Marathon Race ka tenzüksüdüng tangokba noksa nung angur.

**Dimapur, Aami/June 22 (TYO):** International Day Against Drug Abuse and Illicit Trafficking nungtem nung NCORD Mokochung ajanga DHEW Mokochung, Nasha Mukta Bharat Abhiyan den lungjemer Half Marathon Race sentong ka June 22, 2024 nü Mokochung nung ayongzüka liasü.

Iba race tembanga sempet agütsüba sentong ya Main Police Point (Imlong Place) nung agia liasü, kong Senior SP

Mokochung-i anir temesepba mozü achiba aser ayokba anema raratsü tenangzüka agia liasü.

Iba asemtepba nung School Category teburtem rongnungi Tekasanen-i mezüngbuba, Shapong-i tanabuba aser Sungjemtoshi-i tasembuba jenjang nguteta liasü.

Kasa category tetsürtem rongnungi Chuchusangla-i mezüngbuba, Imsusenla-i tanabuba aser Watilemla-i tasembuba jenjang nguteta

liasü.

Tebur Open Category nung Imchalenla, Talirenla aser Shilpa Kahhep nungeri mezüngbuba, tanabuba aser tasembuba jenjang ngua liasü, kasa categoort teburtem rongnung John Minji-i mezüngbuba, Taliyanger Ozukum-i tanabuba aser Temjensanen Aongen-i tasembuba jenjang nguteta liasü.

Iba marathon race ya Deputy Commissioner, Mokochung, Thsuvisie Phoji-i DEF Camp nungi tenzükjia liasü.

### Noklak nung tanur shibelenba nokdangtsü workshop agi



Noklak nung tanur shibelenba nokdangtsü workshop agidang tangokba noksa angur.

**Dimapur, Aami/June 22 (TYO):** India nung arütsü anasa aliba district 100 nung tanur shibelenba nokdangtsü aser samadaksütsü asoshi campaign shilem ka ama June 21, 2024 nü Deputy Commissioner, Noklak indang Conference Hall nung 'Preventing and Combating Child Trafficking' indang workshop ayongzüka liasü.

Iba sentong ya District Administration, Noklak ajanga National Commission for Protection of Child Rights (NCPCR) aser State Commission for Protection of Child Rights (SCPCR) den lungjemer ayongzüka liasü.

Deputy Commissioner, Noklak, Arikumba-i iba sentong

nung okila o jembidang, nisung shibelenba ya meimchir temeden anema lir, kong tetsürtebur, tanur-tain ajak lendongi yoker, ta ashi.

Pai yimya balala nung nisung tem mashi lenmang nung anisaba indang rateta ashi. Nisung shibelenba nung nübu shimba, belenshiba, anidenba mesüra agizükba maparen lir, ta ashi.

Noklak district ya India aser Myanmar arütsü nung lir, anungji mela-mela nisung shibelenba akoker, anungji 'Preventing and Combating Child Trafficking' indang workshop ya kanga nungdaker, ta DC Noklak, Arikumba-i ashi.

Pai iba workshop nung adenba stakeholders ajunga

dang nisung shibelenba indang angazüka kinunger, yimer aser nüburtem nem awareness agütsütsü ayongzüka liasü.

Iba sentong nung shisalen sayur Advocate, Guwahati High Court, Kohima Bench, Tongpang L Jamir-i, nisung shibelenba ya tanü-asüng lima nung alar amshiba lir, ta ashi.

Makamaitba, awareness maliba aser employment maliba amala kuli ajanga nisung shibelenba, ta pai rasaa ashi.

Pai nisung shibelenba atema 'risk groups', shibelenba yimya, timtem ajura aliba nisung angudang nüburtemi mera agütsü indang rateta ashi.

Paisa Acts aser temzüng-ozüng kübok legal provision balala indang rateta ashi.

Iba sentong nung menden ya DCPO, Noklak, Yangtriba Sangtam liasü aser EAC, Noklak, Menlom-i melepzüng o jembia liasü.

Iba sentong nung District Administration, Police, Teachers, Civil Societies, NGOs aser arogo balala nungi dena liasü.



Wokha Town Council atema Urban Local Bodies (UBs) election nung Counting Supervisor aser Counting Assistants atema anogo ka training Deputy Commissioner, Wokha indang Conference Hall nung June 22, 2024 nü agia liasü. Iba training nung EAC & Nodal Officer, Manpower & Training Management, Wokha, Luchui Fithu-i ketdangsurtem dang pei nem nungloktsüba mapa shidak inyaksü ayongzüka liasü.

### Kohima nung tesem kar No Parking Zone sangdongtsü

**Dimapur, Aami/June 22 (TYO):** Kohima Municipal Council atema June 26, 2024 nü ULB elections agütsü aliba mechi June 25 & 26, 2024 anogotem Razhü Point Junction nungi Deputy Commissioner's Office (Via Old NST/New NST/Y-Junction) lenmang ya No Parking Zone alitsü, ta Deputy Commissioner, Kohima, Kumar Ramnikant-i sangdong ka nung metetdaksü.

Tang shia aliba anogo

election Polling Party tem senshiba aser sentepba mapang, nungdakba yari traffic tenokdangba alitsü, anungji nüburtemi timtem arema amalitep akatsü ayongzüker, ta sangdong ajanga ashi.

Aibelenba gari tem atsür aotsü aser iba sen gari kiburi menoktsü aser Motor Vehicles Act, 1988 indang Section 179 kübok temerenshi alitsü, ta DC Kohima ajangasa metetdaksü.

### Arkong Ward tejakleni anitsü asoshi inyaksü mangdang lir : Aongsen Aier



Mokochung nung Ward No-3 Arkong Ward nungi Independent Candidate Aongsen Aier-i ULB election nung tokteptsü asoshi sangdongba sentong nung jembidang tangokba noksa.

**Mokochung, June/Aami 22(TYO):** Mokochung nung Ward No-3 Arkong Ward nungi Independent Candidate Aongsen Aier ULB election nung tokteptsü asoshi sangdongba sentong tatsüka tanu Arkong Ward Mokochung nung par kidang pa phukhumertem adenshia kaogo.

Aongsen Aier pa soa inet Arkong Ward-ji kanga dang meimer, anungji iba ULB election nung ya adoka maongka agir Arkong ward chir ka ama Arkong ward asoshi nübu, mapang, shisatsü agi Arkong Ward nüburtemyonga noktaker ward-sanger tejakleni anitsü asoshi inyaksü mangdang lirta ashi.

Aongsen Aier-isa Arkong Ward nüburtem dang Arkong Ward asoshi inyaksü iba ULB election nung pa yaritsü temepishiba metetdaksü. Independent candidate-isa tang

iba ULB election nung matok ka asünunga Arkong Ward nüburtemi pa nungtakba mapang nung teti yaritsü tangatetba lirta sentong nung adenshia aliba nüburtem dang metetdaksü.

Iba sentong nung Independent Candidate Aongsen Aier phukümer tenünung nung Wb.Ayim Lkr aser Wb.Imswati tenati jembia aser sentong nung Tsüngremer lenisüba jazüka Wt.Mapurenla-i sarasademba den MTBA Deacon Wb.Sashi ketdangsuba nung sentong agia liasü.

Arkong Ward ya Mokochung nung Ward No-3 lir aser iba Ward nung tang aruya aliba ULB election nung candidate 3 NDPP Candidate Wb.Imtitoshi Pongen, Independent Candidate Wb.A.Bendang Jamir aser Independent Candidate Aongsen Aier ta tokteptsü.

### Mobile Phone Hardware Technicians atema angati training agütsütsü

**Dimapur, Aami/June 22 (TYO):** Mobile Phone Hardware Technicians akumtsü jangra alirtem nem PMKVY 4.0 Scheme kübok angati training agütsütsü, ta Directorate of Youth Resources & Sports ajanga sangdong ka nung metetdaksü.

Iba sentong ya Ministry of Skill Development and Entrepreneurship, Government of India ajanga sponsor asür, koba lanurtem mapa inyaksü aser skill development tali agütsütsü nükjidong nung lir.

Iba training ya anogo 75 atema alitsü aser anogo shia ghonda trok alitsü. Training ya Indira Gandhi Stadium, Kohima nung July 10, 2024 nü nungi tenzüksü, ta sangdong ajanga ashi.

Class 8 pass sür aliba arishi küm 15 aser 45 tsüngta nisung temi iba training agitettsü.


Iba training atema menden 100 lir aser shir mezüng arudir par nem maongka mezüng agütsütsü. Iba training atema High School Junction nungi Indira Gandhi Stadium tashi Free Transportation facility agütsütsü aser form ya June 28, 2024 tashinung agütsütsüla.

Iba training atema documents item ya nungdaksü: educational qualification, Aadhaar card copy ana-na aser Passport noksa ana-na.

Iba training atemba sülen placement assistance agütsütsü. Tejangrar temi mobile number +91-9920288490 nung jembia tenüng zülüoktsü akok, ta sangdong ajangasa ashi.



### Exam nung ochimashi maparen anema ozüing tesashi benoker



June 22, 2024 nü Hyderabad House, New Delhi nung Bangladesh Ato kilonser, Sheikh Hasina aser Ato kilonser, Narendra Modi nati külem sangdong ka agütsüdang tangokba noksa nung angur.

#### New Delhi, Aami/June 22

(Agencies): India nung competitive exam balala nung ochimashi inyakyim balala nokdangtsü atema Centre sorkari ozüing tesashi ka yangluogo; iba ozüing kübok aibelenertem küm 10 tashi tepuokdak ayutsü aser senchi sen crore 1 tashi achitsü.

Public Examinations (Prevention of Unfair Means) Act, 2024 ta ajaba ozüing ya ita pezü tejaklen linük Tiri agizüka liasü aser Hokolbar aonung (June 21) Personnel Ministry-ia, iba ozüing ya June 21 nungi mapa küma benokba sangdongogo.

Tang India nung UGC-NET 2024 exam nung ochimashi anema kaketshirtem aser opposition-i longkak aitba mapang nung sorkari ozüing tasen benoker.

National Testing Agency (NTA)-i exam question paper leak asü ta tai tonglokja aliba ken oji Central Bureau of Investigation (CBI)-i bushisingdangtsü.

Personnel Ministry-i, "Public Examinations (Prevention of Unfair Means) Act, 2024 (1 of 2024) nung Section 1 kübok subsection (2) nung agüja aliba tashi amshia Central sorkari iba Act nung shia aliba ozüingtem June 21, 2024 anogo nungi benoker," ta metetdaksü.

The Public Examinations (Prevention of Unfair Means) Bill, 2024 ya taküm February 9 nü Rajya Sabha-i agizük aser

Lok Sabha nunga February 6 nü agizüka liasü. Iba sülen February 12 nü linük Tir Murmu-ia iba Bill agizüka sign süogo.

Union Public Service Commission (UPSC), Staff Selection Commission (SSC), railways, banking recruitment examinations aser National Testing Agency (NTA)-i ketdangtsüa agiba public exam balala nung ochimashi maparen ajak nokdangtsü nükjidong nung iba Act benoker.

Public Examinations (Prevention of Unfair Means) Act, 2024 ozüing kübok aibelenertem küm 3 nungi küm 5 tashi tepuokdak ayutsü aser nisung aikati asalentong yanglur aibelenertem küm 10 tashi tepuokdak ayutsü aser senchi crore 1 tashi achitsü.

Union Minister of State for Personnel, Jitendra Singh-i, iba ozüing ya teloki mesüra rejutemi senotsü tajanzük angutsü atema ochimashi mapa inyakba nokdangtsü aser exam agütsür candidate tem kümzüksü nükjidong nung benoker, ta metetdaksü.

#### Exam inyakyim melenshitsü atema Education Ministry-i luden ka tentet

India nung tetoktepba exam balala inyakyim melenshitsü atema tebilemba onük balala benoktsü asoshi züngsem teneti akümba mongin committee ka tentetogo, ta Honibarnü Ministry of Education-i metetdaksü.

Iba committee jagi exam

balala inyakyim tajungba küma melenshitsü, security protocol tajungba akümtsü aser NTA inyakyim melenshitsü atema tebilemba onük balala benoktsü.

NEET exam nung ochimashi jenti liasü aser question paper leak asüba nung ajemdaker züngsem teneti akümba committee ka tentetogo aser iba committee nung tekolakji taoba mapang ISRO nung Chairman, Dr K Radhakrishnan lir.

Parnoki ita ana tsüngda report renema agütsütsü.

Honibarnü Education Ministry-i, "National Testing Agency (NTA) aser Department of Higher Education-i ketdangtsüa agiba tatidang balala teladak asütsü aser exam balala shidak agitsü atema Ministry of Education-i High-Level Committee of Experts tentetogo. Parnoki examination inyakyim tajungba akümtsü, data security protocols nung temelenshi aser National Testing Agency inyakyim tajungba akümtsü atema tebilemba balala benoktsü," ta metetdaksü.

Iba sangdong agütsüba mapang nungi tenzüka committee-i ita ana tsüngda report renema agütsütsü, ta Education Ministry-isa metetdaksü.

Ano tanga osang ka nung, NEET exam nung question paper leak asüba ken o dak sendakba nung Jharkhand nunga nisung 6 puogo, ta metetdaksü.

### Mamata -i Congress lenir Priyanka atema nübo yimtsütsü

#### New Delhi, June 22

(Agencies): West Bengal Chief Minister aser Trinamool Congress tongti lenir, Mamata Banerjee-i Kerala kübok Wayanad Lok Sabha menden atema election nung Congress lenir, Priyanka Gandhi atema nübo yimtsütsü, ta osang ka ajanga metetdaksü.

Iba ya ajanga opposition teloktep aser Trinamool Congress na tsüngda tesendaktep tajungba akümba temaitsü sayur ta repranteter.

Tawa Lok Sabha election nung Rahul Gandhi-i Wayanad Lok Sabha menden aser Rae Bareli Lok Sabha menden naprongla nungi takok anguba sülen pai Rae Bareli shimba ajanga Wayanad menden azüingtetogo. Iba menden nung Rahul Gandhi teno, Priyanka Gandhi-i tokteptsü.

Wayanad menden nung tokteptsü atema June 17 nü Congress Tir, Mallikarjun Kharge'er kidang Congress bangdak lenirtem senden ka amen aser parnoki Congress general secretary, Priyanka Gandhi Vadra shim; lai tang

mezüing election nung tokteptsü. Tawa Wayanad nung Rahul Gandhi-i vote 3,64,422 tali agi CPI candidate, Annie Raja madak takok ngua liasü saka pai iba menden azüingtettsüogo. Iba menden atema by election nung Priyanka-ia takok angutsü ta aikati bilemer.

West Bengal Lok Sabha election atema TMC aser Congress na melongjemi liasü, ajisüaka opposition INDIA teloktep nungbo party anaprongla densema lir.

Lok Sabha election jakdang Mamata Banerjee-i, Priyanka Gandhi-i Varanasi menden nung Ato kilonser Narendra Modi den tokteptsüla, ta jembia liasü.

Talisa Congress lenir Adhir Ranjan Chowdhury-i Mamata anema jembiba ajanga party ana tsüngda tesendaktep tera raksaa liasü.

Adhir Ranjan Chowdhury-i Baharampur Lok Sabha constituency nung TMC candidate, Yusuf Pathan den toktep saka tamakok angu. Iba jakdangbo Adhir Ranjan Chowdhury-i iba menden nung ponguben tashi takok ngua liasü.



June 22, 2024 nü World Camel Day anogomong nung Bikaner nung aliba ICAR National Research Centre nung Ut nung mener asemtepba noksa nung angur.

### Jodhpur nung tamangba lokti ana tsüngda rara; 40 puogo

#### Jodhpur, June 22

(Agencies): Hokolbar aonung Jodhpur kübok Sursagar nung tamangba lokti ana tsüngda raraba dak sendakba nung Rajasthan Police-i nisung 40 puogo.

Idgah anasa dokan asüba nungi mangatettep adoka telok ana (Hindu-Muslim) tsüngda long agi ontep aser kiojen rongdokja liasü.

Edgah anasa süngküm ka yangluba ashishiba nungi anogo ana tashi mangatettep adokba sülen Hokolbar aonung rara adok. Police tiyongtsüi ia inyakba ajanga tensa raksatsü aliba nokdangteta liasü saka Hokolbar aonung telok kati longkak aitba nungi rara tenzüka liasü.

Lokti ana tsüngda asatemp tenzüka, iba sülen long agi ontepa kiojen raksatsü, dokan ka aser tractor ka mi agi rongdoktsü.

Tensa azüoktsü atema police-i ajok agi lokti zükshiba den külemi tear gas shells khalokja liasü. Honibarnep züngia 1:00 ako tashi nung ang tensa azüoktet. Iba tatalokba nung police-a ana yiruogo.

Iba rara nung shilem agi nisung 40 puogo aser tensa azüoktsü atema sepai tali yokogo.

Jodhpur Police Commissioner, Rajendra Singh-i, tangbo tensa azüokogogo aser iba tesem nung sepai aika yoka lir, ta metetdaksü.

Paisa, telok anapronglai tashishiba agütsüba nung ajemdaker FIR ana benokogogo aser maneni aibelener aika aputsü, ta metetdaksü.

Iba tesem nung joko tensa meraksatsü atema police den Rajasthan Armed Constabulary sepaitem aika yoka lir, ta paisa metetdaksü.



June 22, 2024 nü Bihar yimtiba, Patna nung 'Aam Mahotsav' (titi benjung) nung Bihar Chief Minister Nitish Kumar den tangartem adenba noksa nung angur.





# TIR YIMYIM YIMOBILEM (EDITORIAL)

DIMAPUR AMUNGNÜ, JUNE (AAMI) 23, 2024

## Tashimaitertem den

**A**lima nung tamangba yimsü kar nungbo tsüngrem nem bendanga agütsürtembo lokti nungi pilar azüngmeyakdak balaka nung alir, ajisüaka Khristan yimsü dak amangertem asoshibo yamaji masü. Khristan taküm ka lokti nungi pilaa alitsü makok, ibayongjiang arogo tenzük. Aji oda, Khristan yimsü yabo amangba purtem külemi telongjem ka nung amangtsüba yimsü ka lir. Iba jagi kodang aseni temenen menadir, iba jagi asen dak dang masü saka asenok adenba lokti dena kangshidaktsür. Iba kasaji kodang aseni Tsüngremi mulungba inyakdir, iba jagi asen dang masü saka asen kinunger, asen lokti aser asen arogo dena moatsür. Iba jagiang tenyar Peter-i Asia nung aliba Khristan purtem dangi züludang, "nenok teshimtetba kin, chuba putir telok temeshi kin," ta 1 Peter 2:9 nung shia angutsü. Tetezü asenok Yisu Khrista sülen anidaker asütsü asoshi shimtetba Khristan purtem ya kija kija balala alitsü asoshi shimtet masü saka telok küma Tsüngremi shimtetba kin ama alitsü asoshi shimtet ta asenok nem angatetdaksüner. Ibayongjiang, kodang Korint nung tiyazü tesayurtem adoka amangba purtem tamang nung metsüdakdaksür aser tanüla nung atsüngzüka oa tashimait akümer ta angashi, Paul ajemajema mena melitet aser pa mepelateti aküm. Idangjisa, Paul-i Korint nung alir amangba purtem dang asen temang nung tenüktelen koda yariteper, yamaji külem amangba pur ka peladang külemi pelatepang aser tejashi nunga külemi lemsatepang ta ajungshiba oren ka 1 Korint 12:26 nung shia angrur. Asenoki aiben asenok külemi alir amangba purtem den tepela aser tejashi lemsateptsü mebilemteti asena asen ali alir. Ajisüaka, ibaji Khristan taküm yimya dak maket. Khristan purtembo kati ka den yaritepa alir, iba jagi dang kati ka tamang nung tashi itdaksür. Atangji, aiben asenoka tamanger tajung ka ama amanga aodang asenok külem arogo purtem den melongjemteti asena asen kija aseni mulungba aser jangraba lenmang nung ooya alitsü akok. Idangji aiben asenoki külem arogo nungertem dak kechi ataloker aji memetettsü. Ashiko, külem amangba purtem kar tanüla nung atsüngzüka ooya alitsüa akok mesüra pei taküm aser kibong nung timtem atalokya alitsüa akok. Itemji asenoki metettsüla. Iba ama mapang nung asenoki tashimaitertem maitsüi mesüra tenüng meseni tonga orr parnok den tebilemtsütemji lemsatepa yariteptsüla. Iba amaji asenok amangba purtem nem inyakdaksünüa tenyar Pauli Korint nung aliba amangba purtem dangi züluba lir. Aji oda, asen meketa aliba tesemtem nung külem Khristan purtem reshikangshiba asenoki memetetra aser aser metetyonga parnok timtem tekangshiji asenoki parnok den melemsateptetra asenok tamangba jenjangji ken jungjunga meyipa repringdangtsüba tia nung lir ta asenoki metetdi. Shitakba Yisu Khristai agütsüba temulungjang aser shisatsü adenba Khristan katibo külem amangba purtem pelatepdang mepelaiang malitsü aser parnok timtem reshikangshi aser shisabolu ajurudang tezü ka nung pei kija anisüngzüka melitettsü. Paul daka iba mulungjang liasü. Iba jagi pai ashi, "shiba tashi mait, nia tashi mait masü no? Kodang kar temenen nung tsükdir, idangji nia jashia akümer masü no?" 2 Korint 11:29. Tetezü, asenok amangba purtem ajak dak pei pei yari tashimait lir, anungji asenoki tangar dakang tashimait repringa maitsüi, tashimaitertem denji pei tashimait indang jembia tashi itshidaktsütsü indang ashir. Iba amaji, asenok tamangerbo tamanger ser nung asenok dak tangar den tepela aser tejashi melemsatepnüba shisatsü lira, Tsüngrem dang iba shisatsü melena tangar khuret lemsatepnüba shisatsü enokjang ta sarasademdi. Khristan taküm yabo ni dang junga lira ojang ta masü saka tangar asoshi aria bilemba taküm ka asütsüla. Iba jagi dang asenoki tangar dang Tsüngrem temeim indang shitettsü.

# OLEMSABANG

## LIPOK OTSÜ ASER AOTSÜR SUBUTSÜ ASER TEPTSÜ

~ Mrs. Meyisongla, Rtd. Deputy Director, Nursing Kohima Nagaland.

(Yashi adok nungi...)

(Aori shidakbabo tempar kolak maliper, aji lapi aser Ashikulak mapa) saka tebei par tanur Marsoba dang yamai ashi. Asen tembar ka arua likaji nai pa toai süngkum (gate) tashi meinokjang aser pa kolakji tesülen nongi lepzüker Chubatolar kidang süchi benjong dakji tenang ta ashiji pai yamaji inyak. Tembar kolak alipbaji ashi külak mapa aser tesülen nongi alipbaji lapi nisongi dang yamaji inyaker oh-Marsoba.

Aotsür Aor lipok otsü nong tetsür merenba:

1. Aeinketer – **Onganalai** Chungliyimti yim akumtsü junger, saka tamasa tzübo mesemteta meraktete ayotsü ashi (Hygienic) yimya aser yimji 'oronger' kulak agi külemteter ayimji kumang ta mela.
2. Ken mejemtsü aser kententsü angazükla "**Ayongshi**" la ajanga Aotsür Aori ken mejimba aser atentsü angazük.
3. Sübangsü mezüng daktetla **Marpenla** Moatsü nong züngapur ajak nem süpangsü kaka taka agütsür pelatiba moatsü mong among – iba anügomong la tushia yimer moatsümong amongtsü tenzük.
4. Amitsür kidang sü mezüg achila "**Otsüla Chubatola**" ochi aser mapa meranga inyakla sü achi.
5. Tsüngrem nisong aienketer otsüla "Longkongla" Alima nong ohzü rongnong chuba Tenem ohzü (Hornbill) otsüla Longkongla molungjang nong belemba aser aginüba angateta tenempen petzüka la apama nong tsükdoktsü, idangnongjagi Aotsür Aori tenem pen külang aser temko nong songer yar tsüngsanger. Asenok atema ibai onsara senti rongsen, konang aser tetushi oset ka lir. Yamaji lipok dang nongi Tsüngremi Aotsür aika nem sempet tajong aguja moatsüa aru.

Item otsüren ya I.Temjen Jamir, DSP aser Tialiba aser Y.Yanger Imchen zulu aser adokba kaket aser Folktales and Traditions of Ao-Nagas kakettem nongi teyari agia zulubatem lir.

1. Aotsür subutsü
2. Chungli group
3. Mongsen group
4. Changki group

~ Drawing by Dr. Hutten




A YOUNG CHONGLI WOMAN OF CHUCHU YIMLANG WEARING "MECHONGCHANGSHI" NECKLACES AND "YONGMEN."



1. TATTOO OF A WOMAN OF THE CHONGLI GROUP.  
2. BACK OF THE LEG OF THE SAME.

Drawing by Dr. Hutten.



1. TATTOO OF A WOMAN OF THE MONGSEN GROUP FROM LONGCHANG.  
2. BACK OF THE LEG OF THE SAME.  
3. TORSO OF A WOMAN OF THE MONGSEN GROUP FROM MOKONGTSÜ. THE REST AS IN NO.1

Drawing by Dr. Hutten.



1. TATTOO OF A WOMAN OF THE CHANGKI GROUP  
2. BACK OF THE LEG OF THE SAME.  
3. ALTERNATIVE PATTERN FOR WRIST

Drawing by Dr. Hutten

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



### Methodist Arogo nung lenir ka chioktsü atema sen million aika agütsü

June 22, 2024: June 9 nü Nigeria nung auer telok kati Methodist Arogo nung tongti putir, Samuel Uche apuba sülen pa chioktsü atema Nigeria nung Naira sen million aika agütsü, ta International Christian Concern-i metetdaksü.



Samuel Uche

Tawa Lagos nung osangbenertem senden ka nung jembidang Samuel-i, pa chioktsü atema Naira sen million 100 agütsü, ta metetdaksü.

Senji bosta pongu nung bosta shia sen million metsütsü (20) inoker agütsü, ta pai ashi.

June 9 nü telok kati pa apuba sülen pa kümzüksü atema sorkar, sepai mesüra police-i kecha meinyak, ta paisa metetdaksü.

Samuel Uche den Methodist Arogo nungisa chaplain ka na

Okigwe, Imo state nung Arogo sentong ka nung adenba sülen Nneochi, Abia state-i aoba mapang nung auer telok kati pa apu. Samuel-i, pa apurtemji

Fulani Muslim nungertem liasü, ta metetdaksü.

Muslim nungertem aser Islamic Fulani nungertemi mapang shia pastor tem puer aoer aser taküm küm tenzüker tang tashi nung Nigeria nung pastor 22 puer oa parnok chioktsü atema sen meshiogo, ta International Christian Concern (ICC)-i metetdaksü.

Nigeria kübok tesem aika nung nisung melen sen akhangtsü asoshi nisung apuba tatalokbatem kanga bulua kümogo.

Ano külen nisung chioktsü atema auer telok balala nem sen agütsübaji temzüng alema aibelen ka lir, ta renemba ozüng ka nung Nigeria Tir, Muhammadu Buhari-i sign süogo.

### Tawa Pakistan nung tepsetba Khristan Masih kinüngtsüa süogo

June 22, 2024: Tawa Pakistan nung Muslim nungertem lokti kati tepsetba Khristan, Nazir Masih kinüngtsü Naseem Nazir-a temelungjang tashidak agi Hokolbarnü (June 21) süogo, ta International Christian Concern (ICC)-i metetdaksü.

Masih dak kanga mejungi azükba sülen pa hospital nung treatment tagidak mapang nung süadok.

Taoba hopta tashi Naseem aser lar kibong züngsemtem kanga tsübu dang liasü, kechiyong Eid benjung jakdang jail nungi aibelenertem aika chiok, ta ICC staff jagi metetdaksü.

Taoba hopta chiokba Muslim nungertem rongnung Masih'er kiyongertema aika densema liasü.

ICC staff jagisa, Masih tepsetba nung shilem agirtem aika police-i chiokogo, ibayongji Masih'er kinüngertem aser sosem-tangsem 20 shi kanga tsübu, ta metetdaksü.

ICC-i maneni Masih'er kinüngertem kümzüksü atema inyaktsü, ta staff jagisa metetdaksü.

Pakistan kübok Sargodha nung Masih nem tai tonglokja pa dak azükba dang masü saka par

ki aser pa meyong factory-a rongdokja liasü. May 25 anepdang tanurtem densema Muslim nungertem telok jagi pa dak mejungi azük.

Iba mapang nungji Sargodha District Police Officer, Asad Ejaz Malhi-ibo, Khristan kati Muslim nungertem temeshi kaket Quran shisa ta tai tongloksüba nungi ya atalok aser iba tesem jagi police aika yok ta metetdakja liasü. Ajüsüaka video ka nungbo lokti jagi Khristan meyong ki rongdoktsübaji police-i repranga dang toktsüba jangja.

Pakistan nung 'blasphemy' ozüng kübok Islam yimsü mezüngmeshiba, ainkar Muhammad mezüngmeshiba aser Quran kaket raksatsüra aibelenertem nem temerenshi agütsür.

Iba ozüng kübok Pakistan nung minorities- Khristan, Hindu, Sikh aser Ahmadi nungertem nem tai tonglokja apur.

### Iran nungertem Khristan pongu tepuokdak ayutsü obendang agütsü

June 22, 2024: Iran nung Ahvaz Revolutionary Court-i Islam yimsü toktsür Khristan yimsü agizüker pongu kümsük balala tepuokdak ayutsü obendang agütsüogo.

kübok Arrla 500 nung ajemdaker parnok aitsü. Iba Arrla kübok tesüiba mapangtem nunga Khristantem aika aitsüogo," ta metetdaksü.

Iba dak alia Izeh yimti nungisa Islam yimsüs toktsür Khristan yimsü agizüker, Yasin Mousavi-a küm 15 tepuokdak ayutsü obendang agütsü.

Linük security raksatsütsü nükjidong nung tentetba telok ka nung adenba atema Yasin küm 10 tepuokdak ayutsü obendang agütsü aser paisa 'Zionist' Christianity" ajungketja sorkar anema jembu, ta tai tonglokja küm 5 tali tepuokdak ayutsü obendang agütsü.

2022 küm Iran tesem ajaklen 'Woman Life Freedom' longkak aitba mapang nunga Mousavi pua liasü saka sen aika agütsüba sülen bail nung chioka liasü.

Intelligence sepaitemi Izeh nung Khristantem mita aoba mapang yaküm December 22 nunga Mousavi apu. Pa anogo 20 tashi Ministry of Intelligence

detention center nung ayuba sülen Ahvaz Central Prison (Sheiban) nung puoka liasü.

Iran nung Khristantem reshikangshir, talisa Islam yimsü toktsür Khristan yimsü agizükertem kanga reshikangshir.

Sharia ozüng kübok Islam yimsü toktsübaji aibelen tulu lir aser tasüba temerenshi-a agütsütsü akok, saka aiben sorkari tasüba temerenshi masü saka iba dang nungjagi temerenshi tera tajemba agütsür, ta meimchir temeden atema inyakba teloktemi metetdaksü.

Taküm February ita nung Article 18 indang 'Faceless Victims: Rights Violations Against Christians in Iran' report ajanga parnok Iran dang tamangba yimsü nung ajemdaker pua aliba Khristantem ajak chiokang, aser linük nung Khristantem sademsadema tekülem agitetsü atema inyakang, ta mepishia liasü.

## ANOGO ABEN TSÜNGREM DEN

### YIMJUNG MEIMBA TAKÜM SÜANG

*"Kokrabang naibo nisung ajak den yimjung nung liang." Rom 12:18*

Kotak nung yimjung menüngtak, kechiyong kotakji teti tatem maka tepela, tesünep agi sünga aliba lima. Saka alimaibo yimjungji aginer. Tanü lenirtemi alima nung yimjung lidaktsütsü asoshi ochi mashi mapa den tzüzüng ozüng talenba balala amshia yimjung bener arutsü meranger. Shirnoki yamaji inyaker parnokji yimjung meimertem masü.

Nisungi makokba, meinyaktetba kecha mali kechiyong ajak koktettsüsa, inyaktettsüsa Tsungremi pa shisatsü aser tashi nisung dak enokja lir. Tsüngrem oji ajiang, tesüngmangtsü tobur junga zülua angutsü, "Kokrabang naibo nisung ajak den yimjung nung liang." Iba Tsüngrem o yagi ashir yimjung lidaktsütsü asoshi tzüzüng ozüng menüngdak. Nai aser ni yimjungji meima lira yimjungji kar.

Tsüngrem oi asenok dang mepishia asüngdang kokrabang. Nisung tsüngta meimteptsü, akhümstsubuteptsü, anebaluteptsü, mapa tajung inyaktsü, o tajung jembitsüji mapa tasak masü. Ajak dang temelatiba mapa inyaktsü asoshi Tsungrem oi asenok dang mepishia asüngdang, kechiyong ibaji kotaki aniba lenmang. Adianutem, laishiba nung kokrabang nabo mulumi-i oang ta zülua mangutsü. Saka "naibo ajak den" ta ashibaji tangar ajakji anir Kotak atongtsü merangang ta ashirago yamaji inyaktsü merangdi.



June 22, 2024 nü Zeme Baptist Church, Kohima Women Department-i 'cooking class' ayongzüka agiba sülen tesayurtem aser shilem agirtem külemi tangokba noksa nung angur. Iba sentong nung nisung 50 dak temai shilem agia liasü.



### AO OSHI ANGAZÜKDAK: TANÜ ANGAZÜKTSÜBA OJANG



Tachi

(n) mapang ka indang, kodang tachi ? (approximate indication about a time)

\* Aienertem yim kodang tachi atongtsü ta asüngdanga angashi.

Tachi

(n) tepen (tail)

\* Nashi tachi talang agi manga ayipdoker.

### OLONG PAITEP # 6825

1			2			3		4
5		6						
						7		
8								
								9
		10				11		
			12				13	
14								
							15	
16								

#### TIPIEN

- 2. Auo nung chiyongtsü asenba
- 5. Mangyimba mapang
- 7. O tamendakdak
- 8. Pei dak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

#### LANGTSÜNGLEN

- 1. Lenmang
- 2. Aor kidong ka tenüing
- 3. Tenarong maten
- 4. A \_\_\_ g
- 6. Mopung apodoka
- ola adokdaksüba
- 9. Tongtipang tagitsü
- 10. Menungra bilem
- 11. Aiür
- 13. S \_\_\_ k
- 14. T \_\_\_ r

### OLONG PAITEP # 6824 TELANGZÜBA

#### TIPIEN :

- 1. Telok, 2. Sapu, 4. Alo,
- 5. Anü, 7. Kin, 8. Teti, 10. Süir,
- 11. San, 12. Amo, 13. Nok,
- 14. Tulu, 15. Mazük.

#### LANGTSÜNGLEN :

- 1. Tenükjang, 2. Kiochtsü,
- 3. Senti, 4. Ain, 6. Tajangzük,
- 9. Teronem, 10. Semtu,
- 11. Sak.

### NAI-A YA METETTER MA

**SAMAGRA SHIKSHA**  
**GOVERNMENT OF ANDHRA PRADESH**  
**AMARAVATI**

**State Level Mega Inclusive 10<sup>th</sup> International Day of Yoga Event**  
**with Children with Special Needs and Normal Students**  
 "Yoga for Self and Society"  
 Date : 21<sup>st</sup> JUNE, 2024  
 Venue : Sri Chennupati Ramakotiah Municipal Corporation  
 Indoor Stadium, Patamata, Vijayawada.



June 21, 2024 nü Andhra Pradesh kübok Vijaywada nung otsü tasen ka yangluogo. Sri Chennupati Ramakotiah Municipal Indoor Stadium nung 10th International Mega Inclusive Yoga Day amongdang matamabensar 600 dena kaketshir 1000 külemi yoga asanas aiba ajanga iba otsü yanglutet. Iba otsü ya International Genius Book of Records aser Miracles World Record ajanga agizükogo. Iba sentong ya Samagra Shiksha kübok Inclusive Education Department ajanga ayongzuka agi.

## Mizoram CM-i Union Minister tem den ajurutep; teyari aika angutsü



**Aizawl, June 22, 2024** Sector nung terenlok mapa balala inyaktsü jembitep. (Agencies): Mizoram Chief Minister Lalduhoma-i Union Health Minister JP Nadda den ajurutepdang Centre-i Mizoram nung medical college atema Special Package agütsütsü ashi. Special Package kübok Zoram Medical College nem Rs 170 crores agütsütsü ta Nadda-i Lalduhoma dang ashi. Tenatisa Mizoram Health

package ama SDRF nem Rs 21.64 Crore agütsüogo aser tanabuba instalment agütsütsü" ta Home Secretary Ajay Kumar Bhalla-ia ashi.

Mizoram CM Lalduhoma-i National Security Adviser Ajit Doval den ajurutepdang Indian Army kübok Mizo Scout Battalion tentettsü aser Myanmar tensa onüktem lemsatempa liasü.

Külen, Parliamentary Affairs and Minority Affairs Minister Kiren Rijiju-ia Lalduhoma dang PMJVK kübok mapatong 65 renemtsü nangzük.

CM Lalduhoma-isa Minister Rijiju dang Lok Sabha MP Richard Vanlalhmangaiha nem menden ka lezmüksütsü ashi. Pa ya NDA mesüra INDIA nung maden ta paisa shisem.

## Lawkhua-Bura Chapori Reserve Forest nung nisung 2 khaset

**Guwahati, June 22, 2024** (Agencies): Assam kübok Lawkhua-Burachapari Reserve Forest nung forest guards den khatepdang nisung ka khaset. June 21 nü Sutirpar nung ana reserve forest telungi aidang iba lendong ajuru ta Assam Chief Minister Himanta Biswa

Sarma-i ashi. "Iba mapang ozüing alema arem telungi ayirtem aser forest guards tsüingda raratep. Idangji forest guard kati self-defense nung injang khatokdang Samaruddin (35) aser Abdul Jalil (40) na khaset" ta pai ashi. "Ni Assam Chief Secretary

dang tekaratiba nung bushisüingdang asütsü tetuyuba agütsüogo" ta paisa ashi.

Lawkhua-Burachapari Reserve Forest ya Assam nung protected areas ka lir aser nisungtemi mapang shia ozüing alema ali atsünga agiba aser shikariba mapa inyaka arur.

## Manipur nung truck garitem rongdoktsüba aitsür: ITLF

**Imphal, June 22, 2024** (Agencies): June 15, 2024 nü mejangjatetba nisung kari Bharat Infra Project Limited (BIPL) truck garitem rongdoktsüba aitsür ta Indigenous Tribal Leaders' Forum (ITLF)-i metetdaksüogo.

Pherzawl, Tengenoupal aser Chandel district tem nung khu abenba garitem nem timtem agütsür ta ITLF-i metetdaksü. "Kuki-Zo nungeri aremzükba ya onok tashimait aser kecha meinyakteter ta mebilemstüla. India sorkari hill districts nung nüngdakba khutem shitak angutsüsa mapa inyaktsü ayongzük" ta parnokisa ashi.

Honibarnü ketdangsür kati ashi. Police-i sentong magidaksüba anema nisungtemi ola adoka asaten. "Onok alartem ama melinür", "Ozüing alema aruba Kuki nunger meindokang" aser "Manipur litsü nung meloksatsü" ta parnoki ayimten.

Bishnupur District kübok Tronglaobi yimtsüing nung garitem rongdoktsü. Truck garitem nung Churachandpur-Tuivai Road section (NH-102) nung apu yangluba osettem bona liasü.

#### Kakching police-i public sentong melidaksü

Langsai Thoua ta ser Civil Social Organisation kati public sentong ka ayongba Manipur police-i magidaksü.

Kuki nungeryemi küm ka tema Meitei nunger yimtsüingtem makyonga arur saka central armed forces-i mapa kecha meinyaker ta Langsai Thouna convenor Rajiv Kshetri-i ashi.

Security force peria liaka nisungtemi truck garitem rongdoktsü. Parnoki gari pezü nungi ana rongdoktsü aser iba jagi garitem Imphal-i meyipa ao ta ITLF-i ashi.

Kakching Lamkhai bazaar nung sentong tom ka agidang police-i noktang. Iba sentong nung Naga lennir aser social activist Ashang Kasar aser Imagi Meira Convenor RK Sujata na aden.

"May 2023 nungi kin o kin tsüingda mangatettep adokba ateam public bangzüing ka renemtsü nükjidong nung sentong ayong kechiyong sorkari tamakok nguogo" ta Kasar-ia ashi.

Ministry of Home Affairs-i national highways memokdangtsü ashiba ama July 2023 nungi Kuki-Zo nungeri tashi angaa arur. Yamaji süaka nisungtemi Churachandpur,

Kakching district Police-i law & order nung ajemdaker public sentong magidaksü ta

"Onoki aiben kin o kin tsüingda rara anendaktsütsü atema mepishiogo saka sorkari tai maketertem timtemba mangur" ta paisa ashi.



Arunachal Pradesh sorkari "Pink Patrolling" maparen tenzükogo aser iba ya tetsürtem kümzuka ayutsü atema specialized Police Control Room (PCR) garitem lir. Arunachal Pradesh sorkari tetsürtem kümzuka ayutsü aser iba maparen nung 'Pink Patrolling' ya shilem ka lir ta Chief Minister Pema Khandu-i ashi.



## Putin-i South Korea dang Ukraine nem nok-nü magütsütsü ashir

**Hanoi, Aami/June 22 (Agencies):** Russia den raraba nung Ukraine nem nok-nü agütsüra ibaji aibelen tulu asütsü, ta Russia Tir Vladimir Putin-i South Korea dang tekum dangtsü ashi.

Taoba hopta Russia aser North Korea tsüngta tezüngzüktep tasen ka yanglua kati ka yaritsü pangjemba asoshi Seoul-i Ukraine nem nok-nü agütsütsü asadanger ta ashiba sülen Putin-i iba o ya jembia liasü.

Seoul-i Kyiv nem nok-nü agütsütsü telemetba agira tang South Korea lenirtem mepelatsüsa Moscow-i telemetba agitsü, ta Putin-i Brehostibarnü osangbener dang shia liasü.

Pyongyang nung North Korea lenir Kim Jong Un den ajurutepe defence agreement züliteper mapang tatsüka lir Vietnam nungi Russian leniri iba o ya ashi.

US aser par tempa linük temi Ukraine nem nok-nü

maneni agütsüra Pyongyang nung nok-nü agütsütsü Moscow-ia mulunga lir, ta pai ashi.

"Item nok-nü agütsür temi parnok ya onok den merarar ama bilemer. Pyongyang densema alima nung aliba danga region nem nok-nü agütsütsü ozü temeden lir," ta Putin-i ashi.

Russian-North Korean agreement ya ozü linük indang security tsütsü timtem lir ta Seoul-i aja liasü aser national security adviser Chang Ho-jin-ia Ukraine nem ozü linüki nok-nü agütsütsü sentong asadanger ta shia liasü.

Putin-i iba o jembiba sülen Hokulbarnü South Korea tir indang office ajanga Ukraine nem nok-nü agütsütsü asoshi lenmang balala asadanger aser itemji Russia-i mera agiba dak keta lir, ta shia liasü.

North Korea den tezüngzüktep yangluba tejashi sayua South Korea-i Russian ambassador Georgy Zinoviev jaok aser Moscow-i tangsa Pyongyang den mitkar

tesendaktep anentsüla ta takhangba agüja liasü.

South Korea-i Ukraine nem humanitarian aid aser mitkar amshiba osettsüset agüja lir, saka nok-nü tesashi agütsütsü memulunger, kechiaser par official policy nung rara nung aliba linük nem nok-nü magütsütsü lir.

Putin-i semdangba mapang Kim-ia Russia-i Ukraine amakba nung tashi ajak agi yaritsü nangzuka liasü.

North Korea-i yimjak nung Russia nem nok-nü agütsütsü sangdongba ajanga Russia-i Korean peninsula nung rara adokdang shilem agitsü akok ta bilemer.

Russia aser North Korea tsüngta iba tezüngzüktep yangluba atema South Korea ama United States aser Japan linüktem tebilemtsü akar.

Korea linük ana ya technical tsütsü nungibo tang tashi rara nung lir aser arütsü nung sepa jenti yoka anüker, kong tawa tensa tamajungba kuma aoba angashir.

## Gaza nung Red Cross office anasa nisung 22 tepset

**Gaza City, Aami/June 22 (Agencies):** Gaza nung onok indang office nung injang-bomb khaloktsüba mapang iba temeket nung jenoka alir nisung 22 tepset, ta International Committee of the Red Cross ajanga ashir.

"Hokulbar nikonkdang International Committee of the Red Cross indang office aser yangji inyaker aliba ki nungi metres ishika pilar heavy-calibre projectiles tsük," ta ICRC sangdong ka ajanga ashi.

Civilian aser meimchir yariba tesem nung timtem magütsütsü telok ajak mapa lir ta ashi.

Israel Defense Forces indang odongtar kati iba tatalokba indang bushisingdangba mapang iba tesem amakba mesayur, saka iba tatalokba repringshimtar, ta shia liasü.

"Iba mapang ICRC office raksatsü, koba müketa civilian noklang aika süki yanglur alir, aser Palestine nung külem tenzükera aika lir," ta ICRC ajanga ashi.

"Iba tatalokba ya ajanga anasa aliba Red Cross Field Hospital nung lendong ajurur aika arua lir, aser mozüki nung nisung tasü mang 22 aser virur 45 arua lir. aser ano aika

timtem ajurur lir."

Tawa iba ama lendong tulu ataloka aruba rongnung iba ya ka lir, ta ICRC ajanga ashi.

"Civilian aser meimchir takum lendongi yoka iba ama tatalokba onoki aitsür," ta sangdong ajanga ashi.

Gaza nung Hamas meyong health ministry-ibo iba lendong nung nisung 25 asü aser 50 yiru ta ashir aser Israel tenüng sena liasü.

October 7 nü Israel south tsütsü Palestine nung telungpur telok, Hamas ajanga civilian timba sür nisung 1,200 shi tepseter ano nisung 251 pua bener aoba sülen Israel mitkari iba telok samatsütsü atenzük.

Maneni tesüiba ghonda 24 tsüngta Israel-i amakdang Palestine nung nisung 101 tepsetogo aser 169 yirua lir, ta Gaza indang Health Ministry ajanga Honibarnü ashi.

Iba sülen tang tashinung nisung 37,551 dak tema tepsetogo, aser 85,900 yirua lir, ta iba territory indang health ministry ajanga ashir. Parnoki sangdongba nung civilian aser rarartem bendanga mali saka April ita tatem tashinung asürtem rongnung tanur, tetsür aser teintet rogo 14,680 tejangja sangdonga liasü.

Ano külen United Nations Secretary General, Antonio Guterres-i Israel mitkar aser Lebanon indang Hezbollah fighter tsüngta o agi raraba aser arütsülen khatpeba tebilemtsü lemsatepa liasü.

Anatsülen nungi jembishinü yimya melenshia tashi ajak amshia rara tenzüktsü akok ta ajitpeba sülen UN peacekeepers temi tensa azioka azüdokshi nokdangtsü asoshi inyakteper, ta pai Hokulbarnü shia liasü.

"Khen arsanga mera agiba - khen ongko meshidak inyakba ajanga tesama tulu adokdaksütsü aser arütsü alema, aser asenoki shisadangba dang nungi tali akumtsü," ta Guterres-i osangbener dang ashi.

"Asenoki ya jangja-jangja metetti, Lebanon ya ano Gaza ama akumtsü region nung aliba aser alima nung aliba nüburti matotsü."

Lebanon aser Israel tsüngta Blue Line ta ajaba tesem nung tensa mittsü mechi UN peacekeeping force UNIFIL aser UNTSO ta ajanga unarmed technical observers tem mapang talangka nungi Lebanon south tsütsü amenoka lir.

"Tensa tajungba kumdaksütsü aser mera meshidak agiba nungi nokdangtsü mechi UN peacekeepers temi mapa inyaktar. Alimai ola tulu adoka aser jangja-jangja tangsa tensa süngjendaksüba ya takoktsü dang masü saka nüngdakba lir ta ashitsüla. Yangi military solution mali," ta Guterres-i ashi.

Taoba küm October ita nungi Gaza nung rara arudang Hezbollah teloki Israel nung rockets aser drones khaloktsür aser Israel-i telangzüba agüja tayimtsü amshia amaker aser injang-bomb tesashi khaloktsür. Arütsülen nisung aika tepsetogo aser aika tesem balala nung jenoka lir.

Taoba mapang Israel Ato Kilonser Benjamin Netanyahu aser Defence Minister Yoav Gallant nati Beirut ya Gaza ama kumdaksütsü nangzuka lir.

Israel-i Lebanon nung makra atsüanem makatsü aser ozüng malitsü, ta Hezbollah lenir Hassan Nasrallah-i hopta tetenzüklen shia liasü.



### FoSCoS nung FBOs indang Email ID aser Phone Number yamai update asütsü

FoSCoS User-id atema Primary aser Secondary details kübok Email ID mesüra Phone number agüja aliba mamshitetba mechi password reset mesütetba FBOs atema dang alitsü.

#### Koma Apply asütsü

Iba amala FBOs yagi Designated Officer [Licensing Authority] mesüra Registration Authority dangi email mesüra shiti ajanga pei case indang zülutsüla. Ketdangsur indang email ids ya FoSCoS Homepage - <https://foscos.fssai.gov.in> indang **'Know your officer'** section nung tsünglanglen agüja aliba yimya nung angutsü -

- Phone number aser Email ID update asütsü atema firm/company indang letterhead nung frim indang temelaba aliba nisungi meyongnem agütsür, login credentials mamshiba kuli tejangja ashitsüla.
- Meyongnem agüja aliba indang Aadhar Card, Voter ID card amala photo identity card copy ka.
- Form A mesüra B nung Tang aliba license (s), registration certificate (s)/application (s) copy ka.

#### Authority ajanga inyaksü

FBO [FoSCoS User-id] indang Primary aser Secindary Contact Detalis update asütsü atema FoSCoS Window kübok Licensing/Registration Authorities nem utility agütsüogo.

Email mesüra tezüluba shiti ajanga FBO indang temepishiba anguba sülen Licensing/Registration Authorities ajanga contact details update masü dang tekalen shia aliba documents agütsüba nung ajemdaker FBO verify asütsüla.

#### Shia aliba FoSCoS User-id atema email aser mobile number update asüba sülen FBO ajanga Forgot password link ajanga password reset sütettsü.

For any grievances mail us at: [foodsafetynagalandhelpline@gmail.com](mailto:foodsafetynagalandhelpline@gmail.com)

or Contact Us: +91 6009970644

Time-11:00 a.m - 2:00 p.m, TUESDAY & THURSDAY (on working days)

State Food Safety Authority,  
Department of Health and Family Welfare, Govt. of Nagaland.



# Euro 2024: Austria-i Poland akok, France v/s Netherlands aser Georgia v/s Czech draw asü



France aser Netherlands na asayaba mapang tangokba noksa angur.

**Berlin, Aami/June 22 (Agencies):** Austria nunger Euro 2024 knockout rounds atongtsü teimla ulushia Hokulbarnü asaya nung Poland madak 3-1 agi takok ngua liasü. Mongulbarnü Group D nung Netherlands den tatemsa asaya nung parnoki tamakok majurura Austria ya last 16 atema qualify asütsü. Poland ya temaba jenjang ana nung tembangtsü tamakoktsü kumogo aser best third-placed team pezü rongnung adentsü asoshi kechi südir süaka France madak takok angutsüla. Asaya tenzüker mapang talangka melie Gernot Trauner-i Austria asoshi goal ka tekolak agi tongloktsü, saka minute 30

buba nung Krzysztof Piatek-i Poland asoshi goal ka agüja liasü. Lewandowski ya asaya tembangtsü minute 30 anünga lia aita daksü, koba iba asayamung nung pa asoshi mezüngbuba asaya alitsü, saka paia balaka masayatet. Iba sülen Christoph Baumgartner-i Austria asoshi goal ka agütsü aser minute 78 buba nung Arnautovic-i penalty metsüa goal tasembuba agüja liasü. 1954 sülen Euro 2020 nung mezüngbuba knockout stage tongteta aliba Austria yagi Dutch madak takok ngura parnok last 16 atongtsü tejangja akumtsü. Taoba hopta tepi yiruba sülen

Lewandowski ya asaya tetenzük nungi asayatsü metemsü liasü. Linük anaprong ya Germany den arütsüa lir aser asaya tenzüker minute toku majungdang Trauner-i goal ka tongloktsüba ajanga Austria nunger iba asaya repringertem tepela agi Olympiastadion stadium nung pongzua liasü. Ajisüaka minute 30 ajungtsü lia Piatek-i goal ka yoktet. Iba sülen Austria-i maongka tajung aika junga mamshiteti asaya mezüng shilem tembanga liasü. Minute 60 buba nung Lewandowski asayatsü renemer aita dang stadium nung ola tulu adoka pelatet. Ajisüaka pa aitli Philipp

Lienhart dak takettsü agi ajenba mechi yellow card ka angu. Hokulbarnü anogo asaya danga ka Kylian Mbappe medeni France aser Netherlands tsüngta asayaba nung telok katia goal magütsüteti tembang, saka linük ana ya Euro 2024 last 16 atongtsü anasa lir. Iba asayamung nung France nunger mezüng asaya nung Mbappe teni raksaba sülen Netherlands den pa masayatetsüsa akum. Didier Deschamps-i matchday squad nungbo Mbappe ya inoka liasü, saka parnok knockout atongtsü teimla lir asüiyong pa temang anga ayu. "Kylian ya alima nung asayar tajungtiba rongnung ka lir, aser pa ama ka masayaba ya onok asoshi takoksa. Saka danga asayar temi kanga junga asayaago. Aser pa akok tashi tekeraba nung asaya tenzüktü imlar," ta France midfielder Aurelien Tchouameni-i ashi. Second half nung Dutch midfielder Xavi Simons-i goal ka agütsü, saka offside liasü aser Mbappe maliba yong France captain sür asayasang Antoine Griezmann-i goal ana agütsütsü maongka nguaka pai iba maongka mamshitet. Asaya tembangtsü minute 20 shi lia Simons-i Netherlands asoshi goal ka agütsü, saka mapang talangka agia VAR repringba sülen iba goal ya memela.

Substitute Saba Lobjanidze-i Georgia asoshi maongka tajung ana amajok kumadak saka Czech Republic den 1-1 nung Honibarnü asaya tembanga asayamung tulu nung mezüngbuba point nguteta liasü. Iba asayamung nung jenjang teküpoktiba nung aliba Georgia nungi striker Georges Mikautadze-i penalty metsüba nung goal ka yoka first-half stoppage time atong. Ajisüaka küm asem tejakdang iba asayamung quarter final atongba Czech Republic nungi Patrik Schick-i tayang kepzüka liasü. Schick ya yirur tetsüng atoka tokoa liasü aser Georgia goalkeeper Giorgi Mamardashvili-i goal aika nokdanga liasü. Linük anaprong ya Group F nung asaya ka-ka anünga lir, koba Bodhbarnü asayatsü aser last 16 atongtsü maongka tilala lir. Iba asaya nung Czech nungeri 27 ben goal idaktsütsü merang saka Mamardashvili-i kanga junga nokdangteta liasü. Czech nunger Robin Hranac teka agi ball nung kongshiba mechi Georgia nem penalty agütsü aser Mikautadze-i aibelen mesüi goal idaktsü. Taruba asaya nung Czech ya Turkey den asayatsü aser FIFA ranking nung jenjang 74 buba nung aliba Georgia ya Portugal den asayatsü.

## Kohima nung Olympic Day Run 2024 ayongzük



Abu Metha den Olympic Day Run 2024 nung takok angurtem külemi tangokba noksa nung angur. (Kohima, June 22, 2024)

**Dimapur, Aami/June 22 (TYO):** Nagaland Olympic Association ajanga June 22, 2024 nü Indira Gandhi Stadium, Kohima nung "Let's Move & Celebrate" omen nung ajemdaker Olympic Day Run 2024 ayongzük liasü. Secretary General, Nagaland Olympic (NOA) Association & Vice President, Athletics federation of India, Abu Metha-i sempet agütsüba mapang shilem agir ajak nem tenüngsang agütsü aser nenoka alima nung tanur million aika den Olympic Day benjongmung amunger ta ashi. Nenok yangi Nagaland nung shilem agiba dang masü saka alima tesem ajunga nung saisapong indang ambassador aser osangbener kumogo, ta pai ashi.

Danga linüktem nungi champion adokra nenoka temlungtetba nung meranga inyaka champion akumtsü, ta Abu Metha-i ashi. Pai tanurtem dang tarutsü nung pei wadang nung champion akumtsü asoshi mangdang tulu ayutsü ajungshi aser nenoki bendanga agütsü meranga inyakra ajak akoktsü, ta ashi. Saisapong temaba jenjangi ajungkettsü mechi NOA-i tarutsü anogotem nunga sentong tali ayongzüktsü, aser ibaji ajanga tarutsü nung nenoki national aser international jenjang nung Nagaland aser India tenüng nung nokdaksü, ta pai ashi. Shilem agir aser school ketdangsur temi kaketshirtem iba sentong nung shilem agidaksüba asoshi pelaba

lemsatepdang, saisapong ajanga nisung ka yimya tashi itdaksür aser nisung tajungba kumdaktsür, ta Metha-i ashi. Iba Olympic Day Run nungya arishi küm trok aser arishi küm ti tekübok tanurtem atema 50 metres asemtepba, arishi küm ti aser arishi küm ter tekübok tanurtem atema 80 meters aser arishi küm ter aser 12 tekübok tanurtem atema 100 meters asemtepba liasü. Iba sentong nung Joint secretary, NOA, Kuputo Shohe menden liasü aser Treasure, NOA Neiyalie Angami-i melepzüng o jembia liasü. Takok angur nem senpet aser shilem agir ajak nem kulizüng kaket agüja liasü. Iba Olympic Day Run 2024 sentong nung district balala nungi tanurtem arua shilem agia liasü.

## Djokovic asayatsü mejangjai Wimbledon-i aotsü

**London, Aami/June 22 (Agencies):** Tennis asayar Novak Djokovic Wimbledon-i arutsü telemtetba agiogo aser Hombarnü tonga arutsü, saka iba asamaung tenet ben koka alisang ya temokok surgery agiba sülen taküm iba asayamung nung shilem agitsü magitsü mejangja. Serbia nunger Djokovic ya French Open round pezü buba nung Francisco Cerundolo madk takok anguba sülen temokok achichilen yirua asayamung nungi pilatsüsa akum. Arishi küm 37 tain Djokovic ya anogo 17 jakdang Paris nung surgery agi, saka All England Club nung shilem agitsü asoshi akok tashi practise südar. July 1 nü Wimbledon tenzüktü aser pa ya Paris-i meyipa oa Olympic gold medal mezüngbuba angutsü nukla lir. Ajisüaka pai Instagram nung video ana lemsatepba nung mezüngbuba nung pa gym nung exercise bike aser leg weight machine tem amshia liasü, aser Brehostibarnü lemsatepba video nung pa asemzua tennis ball zükshishia liasü. "Anogoshi tajungba akumer," ta pai Instagram nung pa indang

follower 14.6 million dang ashi. Djokovic-i tesüiba küm pongu Wimbledon final tonga liasü aser taoba küm Carlos Alcaraz-i set pongu asayar akok. Pa operation agiba sülen social media nung pai Wimbledon nung masayatsü ta shia mali. "Anema lia akok tashi tekeraba nung court-i arutsü atema ni tajungtiba inyaker," ta pai ashi. Küm asem tejakdang Taylor Fritz-a French Open mapang temokok achichilen kasa operation agiaka Wimbledon round tasembuba tongteta liasü. America nungba ya Roland Garros nung Dominik Koepfer den asayadang temok yirua wheelchair nung anir tokoa liasü. Ajisüaka ita ka dang lir SW19 nung pai Brandon Nakashima madak sets pezü nung takok angu aser Steve Johnson adak sets pongu nung takok ngur Alexander Zverev-i tsükdaksü. Paris Olympics nung tennis asaya ya July 27 nü tenzüktü, koba Wimbledon temer anogo 13 dang alitsü.

**BILEMDANGANG**  
 "Nisung ajak tia ka-ka lir, aser iba sülenji anidaktsüla."